

殊域周咨錄卷之十九

行人司行人刑科右給事中嘉禾嚴從簡輯

揚州府學訓導長洲彭天翔

江都縣學訓導華容王三汲校

鞮鞢

嘉靖元年詔正各邊軍功正德間閹宦用事諸報效奏帶人往往籍名各邊僞上首功或一人數處或一時數名併功授職極爲濫冒又賜姓入廕錄爵啣者衆至是悉革正其舊有軍門辦事皇后掌理諸名稱者仍置之法初各鎮人徼倖于此者率貴盛一旦權行閭里道路以目至是邊人始有生樂合掌嘆服以爲天道難欺國法有在云 初成化弘治間胡虜遠遁糧餉及時二鎮頗稱富庶後饑饉薦臻寇復數擁又值武宗巡邊賊臣乘機科索軍馬往來支費無紀邊儲日耗正德十六年宣府管糧郎中馮曾繳送本年秋季文冊內開見在本色糧五萬四千八百六十石料五萬

一千六百五十八石草一千三百五十九萬七千三百五束銀二十八萬三千五百三十五兩大同管糧郎中陸傑繳報本年秋季文冊內開見在本色糧十四萬五千四百二十三石料六萬四千六百三十五石草一千二百四十六萬四千九百餘束銀九萬六千六百三十九兩俱僅可爲平常之用一遇有儆遂不能給及宣大走回人口張小兒王成

俱正德七年被小王子部

下達賊搶去

報稱達賊在於西北住牧要來邊上搶殺宣府巡撫李鐸疏言所

報虜賊衆多必須調取主客兵馬分布緊要城堡按伏防虞即今倉庫空虛主兵月糧尙欠客兵從何處給乞查照原討挖運糧米數十萬石速發來邊以救目前之急惟復先發銀五七十萬兩聽管糧郎中設法糴買以備客兵之用事下戶部議得太倉官庫收貯抄沒犯人銀內動支六萬兩內四萬兩准作嘉靖元年年列之數餘作例外補給遂命主事孫儀運送又戶部前因大同巡撫右僉都御史楊志學疏缺邊餉乞給銀開中引鹽改納本色以救濟窘迫議將兩淮運司嘉靖元年分額鹽二十萬引每引

價銀五錢五分開中仍於太倉動支抄沒銀四萬兩正詔從其議復榜諭各關守備等官不許仍前遏糴致悞邊儲遂差進士端廷赦運送吏科給事中楊秉義奉勅往宣大等處散賞還朝復上疏曰臣等比出居庸過岔道但見去關漸遠人烟漸疎以爲沙漠之區固如是不足異也行經舊榆林嚮水舖處昔皆有名村堡今鞠爲故墟屋壁傾圯煙不黔突及入宣府市肆囂然斗米二錢食糧僅千數官軍舊糧尙欠十月而頻聖川等處至有無米可買者又至大同窮苦與宣府相當而倉糧不及其半去至應州盤得見在倉糧止有一斗七升而其餘城堡顆粒無存者尙衆又井陘堡等處調到按伏叅將鄭徹等呈稱欲去則達賊在境欲住則日食無糧進退甚爲狼狽臣等驚異以爲宣大京師之門戶如此室家其何以寧處哉又訪得真定保三府及山西等處秋收頗豐米價視二鎮不啻減半移粟之計未必不可爲今日急務也伏望將內庫戶部收貯銀兩內更發三四十萬選委廉能部屬官于居庸紫荆鴈門等處分投招買糧米令二鎮就

于附近撥人空運則此可省腳價彼可多致米無事則可給官軍月糧有事則可以應客兵支用可爲經久至計緩急有資戰守皆利詔戶部議尙書孫交題稱差官召買重遺勞費及查本部糧草折銀因各處拖欠蠲免解到甚少俱難議動乞請再於太倉庫收貯抄沒犯人銀內動支二十萬兩內宣府十萬兩大同十萬兩宣府六萬兩大同七萬兩准作嘉靖元年例之數餘作例外補給行咨各該巡撫并管糧郎中會同計議將先今解送并彼處見在支剩各項銀兩查照地方豐歉道里遠近從公估計定擬斗頭數目趁時召商糴買糧米嚴立限月上納於緊要城堡收貯以備支用待米完之日就將前銀照數挨次支給其主兵月糧量留折色銀兩相兼放支急聽從宜區處糴米在倉先將舊欠俸糧官軍量給一二月以濟春荒仍行鎮守內外官員斟酌邊情緩急非有重大聲息不許輕調官軍按伏浪費糧草致損邊儲上悉行其議以陳九疇爲都御史巡撫甘肅先時甘州五衛旗軍月糧每一石折放白銀七錢正德十六年年豐米賤

巡撫許銘欲照時估折與銀三錢三分本年十二月初二日銘與鎮守太監董文忠總兵李隆等俱在會議廳議事五衛旗軍二千餘人赴告要照舊價支放銘不允各軍忿怒打毀大門一時擁入銘喝令軍牢將爲首數人縛打數十衆軍稍退不散待至起更時分各軍齊聲吶喊董李二人先行躲避各軍投擲磚石擁入將銘打死用火燒毀及燒廳房又將分巡西寧道僉事劉經搜拏要行謀害經潛避肅府田承奉宅內越牆走脫又將都司廣盈庫并軍器庫打開刼出銀兩布疋盜甲又燒斷事司并中前後三衛鎮撫司打開囚犯出獄至曉太監總兵再三撫諭衆人方退後將解到蘭州未交官民運銀五千三百餘兩令太僕寺卿李炫同副總兵李義給散每軍銀七錢折作十二月月糧一石又令監鎗太監申永下甘肅倉每軍給麥一石亦作嘉靖元年正月分月糧太監總兵會出告示曉諭軍民舍餘人等內有被其脅從者就便改過作爲良民入隊聽候操調並不坐罪悉便遵聽隨假報有虜寇聲息齊軍分布于各街口劄隊軍威振作

初三日晚差出巡視官軍底十九等擒獲元惡王禮羅月屈伏高乞兒等四名斬首示衆同類賀保兒等三十餘人下獄由是餘黨漸息二年正月初八日董文忠李隆上其事以爲許銘自渡河西每行酷刑打死西寧范百戶等又行文各司查審不分久近商人號爲流民納銀公用又抽減商人納過糧草原價又將此銀納豆者每石加增三斗革除夜不收月糧審取三等九則人戶辦納銀兩濫受革前詞訟良善驚疑一次寫匿名帖子綁在箭上射入都察院一次貼于臣門言地方事情不便要將三堂改正臣等聞之甚爲寒心累次勸諫未蒙聽允似此酷剋致生此變即今變亂已平內患已緝邊境獲安寔仰仗我皇上威福所致臣等不職之罪責亦難辭乞勅兵部計議將臣等提獲餘黨亦照例問擬如律以示將來于是陝西巡按御史喻茂堅疏曰都御史乃朝大臣親承上命巡撫一方任用非輕及查許銘條約俱係除革宿敝報國籌邊至計但銳意堅執不無大急夫何各軍倚恃平素驕橫輒肆窮兇聚至千數肆行殘殺焚其屍首極

其慘毒刼去庫銀擅放獄囚悖逆已極大駭人心及照李總兵董太監各操統率軍馬之權豈有不能救正之理況彼時會議同在一處乃任其作變束手先避罪豈容追及戕害已極之餘雖稱擒獲爲首四名爲從三十餘人未審是否真正原謀同惡之人慮恐尙有主使元惡未獲寃憤何由而洩國法何由而彰乞速選風力老成練達都御史一員星馳前去巡撫與同鎮守總兵官同寅協恭戮力邊務庶重鎮無不制之兵而覺孽可弭矣陝西御史許翔疏曰甘肅爲西陲巨鎮人雜夷虜少知禮義之化數年以來上下剝削誅求軍民困苦已極許銘銳意事功除奸清敝驚駭人心不無太急一時無知小民有不堪者訛言繁興遂相媒孽構成大患其首從惡逆死有餘辜鎮守總兵將領等官亦有不得辭其責者也事俱下兵部議乃會推九疇爲甘肅巡撫兵部尙書彭澤疏稱鎮守董文忠總兵李隆統領官軍在彼既不能設法調度爲預防于未然又不能極力拯救消禍亂于臨事顧乃假以勸諭爲名以致怨歸巡撫自脫罪愆迹其所由

固許銘欲振肅風紀于初任而未免撫馭少恩亦緣切禁總鎮官員沿集之宿弊而寅恭未洽各官雖無故縱主使之情難免嫁禍苟全之罪其副總兵李義陝西行都司并各衛等官平時既已失軍士之心而無約束臨難又疾視長上之死而不救援論法通合拏解來京追究重治但地方缺官干礙人衆請行彼處巡按會勘擬奏發落其總兵太監乞降勅切責令各戴罪管事務要與新任巡撫同心協力修舉邊務不許仍分彼此失機誤事貽患地方自取重罪上從其議詔有罪人犯着巡按御史會同守巡兵備等官從公查審擬議情罪其餘軍士人等不曾同入幫惡情有可原俱免追究許銘着以禮棺殮照例祭葬并伊家小差官護送還家 時三邊傳報緊急聲息兵部尙書彭澤請設總制官以禦虜患上乃命侍郎李越兼都御史巡視經畧遇有達賊侵犯即便調兵防禦剿殺陝西三邊鎮巡等官俱聽節制京營大寧等處官軍不必帶去宣大山西官軍有緊急調應援事寧具奏回京越既拜命即上疏曰禦戎之道守備爲本守備所

資錢糧爲急陝西三邊地方廣濶年來將不擇人守備全廢兼以剝削日甚索取百出以致衣糧不得給散軍士因而逃亡缺伍糧草託故扣除馬匹因而瘦損倒傷積弊之極言不能盡各該鎮巡總兵等官連章奏討拖欠年例等項銀兩雖已經戶部奏准轉解應用但所解之數不能盡償所負及已解去計今亦恐費盡臣品識凡庸當此巡視經畧之責敢不罄竭心力仰副簡命念惟事須預圖庶克有濟臣卽日起程前去到彼之日賊尙住牧在套必須調度人馬分布要害先爲防守倉卒應變錢糧最爲緊急若不早爲計處臨期方行奏討不無緩不及事乞勅戶部于太倉及內府抄沒犯銀內動支三十萬兩兵部于太僕寺常盈庫動支馬價銀一十萬兩各委的當官員管解軍前聽臣分派各鎮羅買糧料草束買補征騎事下兵部議彭韶上疏曰陝西三邊地方十餘年來虜患侵擾不時債帥貪官剝削尤甚京運民運之糧銀拖欠數多修邊買馬之勞費徵派未息甚至月糧布花經年不得關支祇因貧苦之極遂萌悖逆之謀將巡撫

重臣殺害雖其逆理戕上自取極刑而饑寒困迫亦當軫念且延綏巡撫姚鏌奏要修理邊牆寧夏巡撫王時中奏要招募軍士用銀不下十萬俱未給發所據見差巡視經略李越奏討糧餉馬價銀兩殊不可缺請行太僕寺常盈庫及勅戶部于內府抄銀并太倉收貯銀兩俱如數給發以救三邊倒懸之苦用舒皇上西顧之慮所屬應解各邊民運糧料本色折色及布花一應拖欠侵盜之數一併查究督發施行其戶部并本部累次解去糧料馬價銀兩支銷出入的確數目行李越逐一清查明白甘肅見監并未獲人犯仍咨行巡按御史從公勘問查議明白奏請上乃命動支內府并太倉銀兩各十萬兩前去支用馬價太僕寺動支十萬兩甘肅勘問罪人各邊清查錢糧等項事情俱依擬行新任巡撫陳九疇着上緊去御史王應鵬疏曰朝廷之所恃以控制海內者惟威與福耳威福不行則朝廷不尊不尊則人心不葺于是有畔渙不軌者無忌而肆行矣今天下承平日久言治者每病其恩之多威之不足也近見甘肅都御史許銘被

旗軍殺死何以有此往年閩閩作亂其禍起于鎮守太監羅鑰未幾鑰亦不免蓋亂不可啓禍不可長可以犯彼則可以犯此矣固理勢之必至也李隆等獨不鑒歟易曰履霜堅冰至若今日之事則可以言冰不可以言霜矣切恐天下之強軍捍卒聞而效尤斯不爲之寒心耶 兵科都給事中許復禮疏曰唐臣兵部侍郎許孟容上憲宗之言曰自古未有大臣橫死路隅而盜不獲者此朝廷之辱也宋太宗亦謂宰臣曰五代諸侯跋扈有枉法殺人者朝廷置而不問姑息當如是耶我國家自正德以來政教號令不大行于天下而姑息苟且之政足以廢法度而斁綱常况甘肅窮荒極鄙之隅亦常有需求征調之擾人心玩揭思變久矣請以往事陳之昔年都御史才寬被害不明竟未查究都御史安惟學被亂軍殺死未正典刑都御史屈銳被軍衆因禁亦未伸法至于福建效尤福州衛則擁入布政司打碎屏風要將布政伍符殺害郡武衛則群呼攘鬧將教諭洪鼎捉鎖遂行建寧衛則將通判張鴻亂打辱罵宣府則於三堂教場演武傳

示吶喊無一人應之幾至成變此皆以缺糧爲由倡亂梗化目中已無法度矣而地方之官常隱忍而不報朝廷之上每每視爲泛常但以招撫爲名反加酬勞之典養其驕橫狂悖之氣良可慨也故曰封建非能弱周周自弱也藩鎮非能亡唐唐自亡也臣等讀董文忠李隆等章奏反覆玩味事有可疑都御史太監總兵號稱三堂同功一體之人也古稱將相調和則士豫附今都堂受害而太監總兵安全無恙有是理乎爲各官者正宜引罪自責以俟朝廷之處分爲當且羅織事端妄行叅劾欲脫已罪而歸咎於人末復稱變亂已平內患已弭誇張自是不以爲罪而反以爲功蓋謂天高可欺誠誣罔也伏望痛懲往事之愆大奮乾剛之斷乞勅該部議處選差三法司堂上官各一員前去甘州地方從公查勘追究根由細分等第奏請處治以剪削渠魁屈此群醜以伸朝廷之法以洩九原之冤

六月二十六日達賊一萬七千餘騎自平涼府一帶涇河陽保二州原擁進塵土蔽天直抵窯店等處地方劄營三日至七月朔起營通共五日聯

接老營五十餘里四散鎖牽漢人指引掏挖搶殺陝西巡按俞茂堅疏稱
寧夏中路住劄小鹽池叅將楊義陝西住劄固原衛總兵官劉淮膽喪魄
奪百千生靈被其糜爛而官軍不聞有一矢之或遺此其故何哉實由虧
折官軍難於回護則各將之罪難逃殺搶人民難以查考則各將之罪易
掩故爲將者每每坐視寧殺萬姓不折一軍夫民以供軍而民反爲軍而
死軍以衛民而軍却倚將而生吾民何辜一至此極乞勅將楊義等提問
如律御史黎貫等疏稱陝西總兵官劉淮延緩副總兵朱鑾寧夏副總兵
劉玉寧夏遊擊周尙文固原遊擊陶文喪師辱國巡撫陝西都御史王珣
鎮守陝西太監晏宏總制陝西延寧甘肅侍郎李鉞覆將敗軍乞勅兵部
議擬卽將失事將官劉淮神指等拏解來京從重治罪王珣晏宏取回究
治李鉞亦乞降勅嚴加戒責令其戴罪備禦或者又謂臨敵易將兵家所
忌只宜姑記其罪然趙用廉頗而易之以趙括則敗秦用王齕而易之以
白起則勝蓋臨敵易將顧所易何如耳上詔這套賊爲患先因守土官員

調度失宜隄備不謹彼此推託節次誤事朝廷特簡素有才望大臣前去
總制軍務各該鎮巡等官不行協謀共濟合兵追勦以致虜寇深入肆行
殺掠本當拏解來京從重治罪但有事之際劉玉朱鑾伸揖周尙文陶文
時陳且着戴罪殺賊着巡按御史查勘有無後功并各官失事情罪明白
奏來定奪各該巡撫鎮守官都着從實回將話來劉淮革回原衛帶俸還
寫勅與李鉞着展布四體加意規畫先事如何遏截臨事如何追勦查照
你部裏節次題奉事宜議撥方畧處置停當嚴督各屬同心戮力以責後
效再有互相觀望阻壞軍情的指實奏來處治 五月大同鎮城軍士因
出教場演試武藝各軍慮恐生疎比較張的祥等遂以邊糧修邊爲詞閨
然吶喊回到四牌樓將賣米蔣彪等在市糧米或搶或撒擁衆到於巡撫
門首時都御史楊志學因病不曾開門各軍吶喊嗔言不與主張及不討
糧將告示牌面打毀又到管糧郎中巡按御史門首因見各官閉門將門
前照壁折取甃瓦拋打門外排柵告示牌面俱各打毀提督侍郎臧鳳上

其事上詔張的祥等驕縱狂悖漸不可長著減鳳再審爲首及情重的即於軍前斬首示衆爲從的調發極邊衛分常川哨守其餘旗軍人還出榜曉諭令各安心護守城池再有違犯不饒鎮巡官節制欠嚴張欽簡閱欠處本當究問且都饒這遭御史俞集疏曰宣府乃京師巨蔽大同亦西藩先帝往來巡幸而江彬諸黨席寵怙權頤指撫臣殆若下吏下之人見寧呆輩忍恥屈辱遂有輕藐撫臣之心滋寢成俗雖有巡撫都御史如楊志學之鎮靜養士李鐸之振起頽弊風猶未殄伏望特降中勅得以專斷外間人或干紀許以軍法從事使人皆知撫臣之威凜然有不可犯朝廷之勢隱然日益以尊豈非所以警姦宄之心乎兩鎮頻歲荒歉而權家勢要耗損邊儲軍士衣糧虧欠未支者約有數十餘萬之多伏望軫恤窮軍誕敷渥澤舊欠者將臣等查出銀兩照數追補新支者悉得以按月關給無令乏匱否則宣大之患不在夷虜之遠而在鎮城之近矣宣府地方有屯田團種地畝等糧歲不下十餘萬石有椿朋尖丁團種馬價等銀歲不

下五萬餘兩郎中總糧儲分巡理刑名固未違於催督也例該屬之都司
往者寧杲侵漁數多悉焚都司案卷以致漫無稽考侵尅蠹費伏望該部
議處添設分守叅議一員專以督司各項出納庶事體歸一宣府一鎮分
東西南北中五路大同一鎮分東西中三路其士馬之供應錢穀之出入
責皆萃于郎中也邇來拘於資格往往多不得人且以正德年來郎中觀
之宣府僅有解經一人操守深爲可稱人才誠爲難得今後差遣總理毋
得拘泥常資郎中乏人即於員外內選差員外乏人即於主事內委用取
其操履清修而不在年限之深淺求其才識端敏而不在爵序之崇卑可
也 老營堡地方舊規遊擊將軍俱在本堡住劄竇錦畏懼邊境擅自呈
請回關扇搖各軍後在教場操揀有管隊步軍四千餘人執旗齊聲說稱
先年拖欠月糧通未補給去年五月至今雖每月闕支銀陸錢米價騰貴
止買米三斗父母妻子不能相顧一齊擁入要赴巡撫衙門訴告鎮守山
西太監張景昌提督都御史胡錠各叅稱竇錦回家旬餘各軍未應便迫